

2 TESALONAÏKA

Pol kivuu kipihac wê vông yuu ge la vô tibii Tesalonaika

¹ A, Pol, xen Sailas yuu Timoti, xen kivuu kiyang ga vô xam Tesalonaika wê xam vông i vin Yesu ge. Xam tu il Mag Anutu yuu Apumtau Yesu Kilisi xe pyap.

² Mag Anutu yuu Apumtau Yesu Kilisi yuu i vông xam dô vac vizid nivaha di vông kiyang malehe i hivun xam xôn.

Pol pimil Anutu

³ Xam lige, xe nilôm kidu xe om xe pimil Anutu ên xam tiyi buc vihati. Môm tige môm bôbac, ên vông vinên wê xam vông ge diyêp xêkizêc di vô levac tiyi buc vihati, di xam toto xêmyaa mi vin lecma nô, di môm xêmyaa vin lecên tige divô levac vac xam mahigun tiyi buc vihati.

⁴ Mêgem xe yong xam lêm vô levac vac konglegesen viyang viyang ge bêga ên xe nêbê xomxo vông viyin yuu myavinê levac vô xam lec wê xam vông i vin ge, lêcom xam le xêkizêc ta di kilê viyin di hôm vông vinên wê xam vông ge xôn pilihi.

Anutu yaxên il ya môm bôbac

⁵ Xam mi le xêkizêc ta vac vông vinên, om xam môm bêge nêl xam kitong ên nêbê Anutu yaxên xam ya môm bôbac, om gwêbaga xam kô viyin levac ên wê xam tu Anutu nue ge, lêcom viyin

tige ob vông xam vô nivîha tiyi wê xam ob la dô vac Anutu ben lag puunê ge.

⁶ Di Anutu ob vông môp bôbac ngwe hixôn bêga bê ob vông myaviwen nipaên vô he wê vông viyin vô xam ge,

⁷ di ob vô viyin vêl ên xam, di ob vông il xôn dô seac vêl vô buc timuên wê Apumtau Yesu hixôn angela xêkizêc wê i vông ge obêc sea ben lag puunê di lop mi lam le seac ge. He ob lam hixôn ngwax mahelac levac,

⁸ di ob vông myaviwen nipaên vô xomxo wê lungên Anutu gee hixôn he wê vô ninya kitu vô il Apumtau Yesu xolac gee.

⁹ Om he ob kô myaviwen nipaên bêga bê Apumtau obêc ngiloo he la vêl tevabanê ên i manôn hixôn xêkizêc levac yuu xêseac wê i vông ge, om he ob la dô vac nipaên luta lêc luta

¹⁰ vô buc timuên wê Kîlisi obêc lop mi lôm ge. Vô buc tige xomxo wê vông i vin di tu i nue gee vihati ob nêl Yesu lê vô levac di pimil i hixôn xêyaa nivîha yang. Mêgem xam êno ob vông bêge ên xam vông i vin Anutu kiyang wê xe nêl vô xam ilage.

Pol kîtaa vô Anutu lec tibii Tesalonaika

¹¹ Xe xovô ên xe nêbê xe nêl xolac vô xam ilage di xam vông i vin. Mêgem xe kîtaa vô il Mag Anutu tiyi buc vihati bêga bê i ngidu xam xôn ên xam tu xomxo nivîha tiyi wê xam ob vông môp yuu yuac nivîha vihati wê Anutu tyuc xam ên nêb xam ob vông ge. Di xe kîtaa vô Anutu bêga bê i ngidu xam xôn ya xêkizêc wê i vông ge êdêc xam vông môp nivîha vihati i tiyi wê xam

nêb xam ob vông ge, di xam vông yuac vihati wê xam vông ên wê xam vông i vin Yesu ge i diyêp nivîha.

¹² Xe kitaa bêge ên xe nêb môm wê xam vông ge i vông il lig Apumtau Yesu lê i vô levac, di Yesu i vông xam lêm i vô levac êno. Il Mag Anutu hixôn Apumtau Yesu Kîlisi obêc vông bêge ya vizid nivîha wê yuu vông ge.

2

Kiyang lec xomxo nîpâên kehe nôn wê ob tu levac ge

¹ Xam lige, a ob nêl kitong vô xam lec buc wê Apumtau Yesu obêc vena di kituc il xôn mi il la vô i ge. Om xe nêl kitong vô xam bêga ên xe nêbê

² xomxo ya ob val nêl kiyang kityooên vô xam ên nêbê buc wê Apumtau ob vena lec ge val pyap. He ya nêl i tiyi xochê plopete kityooên mi nêl ge, di he ya nêl ya xovôên wê heche va vông ge, di he ya so ên he nêbê xe kîvuu kiyang tibêge vac kîpihac. Om xam obêc ngô kiyang kityooên tige ge od xam nîlôm i o léc vô vîyin di xam vông i vin kiyang tibêge lutibed lêm.

³ Le i léc vông i vin kiyang yuu môm kityooên wê xomxo ob nêl vô xam ge lêm, ên buc tige obêc seb lam tax lêm. Nge, xomxo tîbeac hîwocên ob pwoo Anutu kiyang vac di vô nîmi vô Anutu, di xomxo nîpâên kehe nôn ob val le seac tax, nang dêc Apumtau ob vena timuên. Xomxo nîpâên kehe nôn tige wê Anutu ob vông i la dô vac Seten ben.

⁴ Lêc xomxo nipaên tyo ob val le seac lê, lêc vông vevac vô Anutu nôñ ãi anutu baba wê xomxo vaci vınoo ge hixôn susu ngıbuia vihati yang, ãi ob yong ici va lê êñ nêbê i tu levac ãi luu susu ngıbuia vêl. Om ob la vac Anutu xumac ngıbuia ãi la dô ãi kityoo xomxo êñ nêbê, “A ga a Anutu tyo mêga.”

⁵ İlage wê a loc dô hixôn xam ge od a nêl kiyang tiga kitong vô xam. Mêd xam lungên kiyang tige tii vac nang, me?

⁶ Lêcom xam xovô êñ xam nêbê gwêbaga xomxo ngwe le vac xomxo nipaên tyo nêñ môt xôn êñ nêb i lamên i ma, lêc ob lam le seac vô buc timuên wê Anutu vınoo vô i ge.

⁷ Xomxo nipaên kehe nôñ tyo valên gên ma, lêcom gwêbaga i vông yuac nipaên wê pwoo Anutu kiyang vac ge mi dô xôpacên. Mêdêc obêc buc timuên ge od xomxo ngwe wê le vac i xôn ge obêc titêc la vêl,

⁸ mêd ge wê xomxo nipaên kehe nôñ tyo ob lam le seac. Nang dêc Apumtau Yesu ob hi i yib ya myakilôhê wê lam vac mya ge. Apumtau ob lam le seac hixôn xêseac wê i vông ge, ãi ob hi xomxo nipaên tige vô nipaên ya xêkizêc wê i vông ge.

⁹ Lêcom buc wê xomxo nipaên kehe nôñ tyo obêc val ge od obêc val hixôn xêkizêc wê Seten vông ge, om ob vông yuac levac hixôn do levac wê kityooên ge vıyang vıyang,

¹⁰ ãi ob vông môt nipaên wê kityooên ge vihati êñ nêb i kityoo xomxo wê ob la dô vac nipaên luta ge. Xomxo tige xêyaa obêc vin lec Anutu kiyang nôñ ge od Anutu ob vô he vêl êñ he nêñ

nipaên, léc he vô nîmi vô om Anutu ob kitya he vêl.

¹¹ Mêgem Anutu ob vông xêkizêc wê kityooên ge vô he ên nêb he i vông i vin kiyang kityooên.

¹² Mêgem he vihati wê o vông i vin kiyang nôn lêm di xêyaa vin lec môp nipaên ge, Anutu ob nêl he nêl nipaên kitong di vông he la dô vac nipaên luta léc luta.

Anutu vînoo xam pyap ên nêb ob vô xam vêl ên nêl nipaên

¹³ Xam lige, Apumtau xêyaa vin lec xam, di xe nilôm kidu xe om xe pimil Anutu ên xam tîyi buc vihati, ên mugên ilage Anutu vînoo xam ên nêb ob vô xam vêl ên xam nêl nipaên. Om vô xam vêl ya yuac wê Myakilôhê Ngibua vông ge hixôn môp vông vinên wê xam vông ge, ên xam vông i vin i kiyang nôn.

¹⁴ Mêgem Anutu nêb ob tung xam la dô vac xêseac wê il Apumtau Yesu Kilisi vông ge, om didii xam pyap ya xolac nivîha wê xe nêl vô xam ge.

¹⁵ Mêgem xam lige, xe nêl vô xam bêga bê xam le xêkizêc di hôm kiyang nôn wê xe nêl vô xam vac myam di kivuu vac kipihac ge xôn pîlihi di timu vô.

¹⁶ Il Apumtau Yesu Kilisi yuu Mag Anutu, yuu xêyaa vin lec il om vông vizid nivîha vô il ên nêb ob ngîdu il xôn di vông il nilôd i vô viyin maên luta léc luta. Di yuu ngîdu il xôn om il dô bin nôn nivîha wê yuu ob vông vô il timuên ge.

¹⁷ Mêgem xe kitaa vô Anutu ên xe nêbê i ngîdu xam xôn di vông xêkizêc vô xam êdêc xam vông

yuac wê nivîha ge ya di nêl kiyang wê nivîha ge vîhati.

3

Xam kitaa vò Anutu bê i ngîdu xe xôn

¹ Xam lige, a ob nêl kiyang ngwe hixôn bêga bê xam kitaa vò Anutu bê i ngîdu xe xôn ên Apumtau kiyang i loc vac vigwe vîyang vîyang ge lutibed dî i vò levac i tiyi xocbê vò levac vac xam mahigun ge.

² Dî xam kitaa vò Anutu bê i vò xe vêl ên tibii nîpaên wê mi vông mîp nîpaên ge vigê, ên xam xovô ên xam nêbê xomxo tibeac o vông i vin Anutu lêm.

³ Lêc Apumtau ob pwoovya vac di sea il lêm. Nge, ob vông xam le xêkizêc di viac xam, ên Seten i o vông xam vò nîpaên lêm.

⁴ Apumtau vông xovôên vò xe lec xam, om xe xovô en xe nêbê gwêbaga xam ditîmu vò mîp vîhati wê xe vông vò xam ge, di xe xovô ên xe nêbê timuên ge xam ob vông mîp bêgee i tii vac nang.

⁵ Om xe kitaa vò Apumtau bêga bê i vông xovôên nivîha vò xam ên xam vyac xovô bê Anutu xêyaa vin lec xam, di xam xovô bê Kîlisi le xêkizêc di kilê vîyin.

Xomxo vîhati i vông yuac

⁶ Xam lige, xe tu Apumtau Yesu Kîlisi manôn di nêl vò xam bêga bê xam kol xam mi dô teva ên lime vông vinên wê mi vò ni maên ên he yuac kibun ga, ên he o vông i tiyi wê xe nêl vò xam ilage lêm.

⁷ Ên xacxam va xovô pyap bêga bê xam ob tup vô môm wê xe vông ge, ên buc wê xe loc dô hixôn xam ilage od xe o dô vidaaên di yuac ma lêm,

⁸ di xe o kô yaên ti vô xam pileva lêm. Nge, xe vông yuac bisnis tiyi vidiiên yuu bucên vihati ên xe nêb xe ob kô mone lec di kisuu xe xom yaên vô xam léc xa, om xe vông yuac levac ên xe nêb xe ob vông viyin vô xam ên susu yaên lêm.

⁹ Xe vông yuac bêge, lêcom xam xovô ên xam nêbê xe tu xam nêb levac om xe tiyi wê xe ob nêl bê xam vông xe xom yaên pileva. Mêléc xe o nêl bêge vô xam lêm, ên xe nêb xe ob hilung môm nivîha wê xam ob timu vô ge vô xam.

¹⁰ Om tiyi buc vihati wê xe dô hixôn xam ge od xe nêl vô xam bêga ên nêbê, “Xomxo ti obêc nêb ob xeedô pileva di yuac i ma ge od xam o léc vông yaên vô i lêm. Toto vigê i vông yuac lec, léc ya.”

¹¹ Xe nêl kiyang tibêge vô xam ên xe ngô wê xam ya dô vidaaên di o vông yuac ti lêm. Nge, xam ngena tibeac lec xomxo mangwe yuac wê he vông ge, di xacxam va ge xam o vông yuac wê xam ob tulec yaên ge lêm.

¹² Mêgem xe viac kiyang vô he wê mi dô vidaaên ge di nêl xêkizêc lec Apumtau Yesu Kîlisi lê bêga bê he i dô nivîha di vông yuac ên tulec yaên.

¹³ Xam lige, xam nim i o léc ma lec môm wê xam ob vông nivîha vô xomxo ge lêm,

¹⁴ di xomxo ti obêc vô nînya kîtu vô kiyang wê xe kîvuu vac kipihac tiga ge od xam xovô xomxo tyo di kol xam mi dô teva ên i, ên i xovô nêb soên

dì ni i yoc ên i.

¹⁵ Lêcom xam o lêc wê i xochê tibii wê vông vevac vô xam ge ti lêm. Nge, xam wê i xochê xam lime môci ti, di viac kiyang vô i ên i xovô.

Kiyang viwen timuên

¹⁶ Apumtau vaci wê kiyang malehe kehe ge i vông xam nilôm i vô malehe lec i tiyi buc vihati, buc viyin hixôn buc nivaha. Apumtau i dô hixôn xam vihati.

¹⁷ A, Pol, a kivuu kiyang tiga ya vigêg di a nêl vidiiên vô xam. A mi kivuu kiyang di

mi nêl vidiiên vô xam vac kipihac vihati wê a kivuu ge. Mốp wê a vông ge yêp bêge.

¹⁸ Vizid nivaha wê il nêd Apumtau Yesu Kilisi vông ge i loc dô hixôn xam vihati.

Yesu Xolac
The New Testament in the Patep Language of Papua
New Guinea
Nupela Testamen long tokples Patep long Niugini
copyright © 1986 Wycliffe Bible Translators, Inc.

Language: Patep

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-14

PDF generated using Haiola and XeLaTeX on 18 Apr 2025 from source files dated 31 Aug 2023

3d2c844d-4bc8-590b-bbf2-3a5fcd1f7ad8